



Sabtu, 29 Oktober 2022
Ogen : Ulangan 11:18-22



"Ajarken Man Anak-anakndu"



Adi si perdiateken anakta si nguda genduari enda, melala si lanai ermediate nandangi lingkungenna. Nggeluh enggo erbana-bana, tempa lanai ia perlu teman sekelewetna. Deba identitas diri pe lanai perlu man bana, umpamana bahasa karo lanai ipelajarina selaku ia kalak Karo, lanai pakena merga entah beru kai ia. Dahin-dahin kuta la ia ikut muat bagin tempa dahin e sekerajangen orang tua ngenca. Adi lit pe perjengilen i bas kuta la lit ukurna uga mpekenasa. Banci kataken rasa nasionalis e enggo terkikis.

Tupung Musa kitik denga, ringan ia i istana Mesir ras nandena, i je melala ia erlajar kerna kegeluhen bangsana. Iajari nandena ia maka situhuna ia labo bangsa Mesir amin ia ipegalang-galang i istana. Mbelin kal ngaruh nandena man bana, isuanken nandena tetap maka ia kalak Israel. Ia arus ermediate man kegeluhen bangsana. Kenca ia galang erdalan-dalan ia i sekelewet istana, iidahna bangsa Israel e jadi budak kalak Mesisr mekuah kal atena. Ersura-sura ia lako nampatisa. Em jiwa nasionalis, lit sura-sura mbela bangsana.

Terus ku bas ogenta enda pe ipersingeti orang ta gelah tetap ngajarken undang-undang Tuhan man sinursur, subuk sangana i rumah, i juma, i bas perdalanen, i tiga entah i ja pe gia. Unang-undang eme engkelengi Tuhan Dibata ras engkelengi teman senina. Jadi lit i je nuanken jiwa nasionalis e me ermediate man sekelewet, ras man negara janah njaga identitas diri selaku bangsa Dibata. Umpamana, ajuk anak-anak masang bendera Merah putih tupung wari kemerdekaan. Ikut nampati dahin-dahin kuta, gotong royong ras sidebanna.